



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tiryimyim@aolima



tir yimyim

TAPAK 3

**Sheikh Hasina-i kümsük
pongububa election kokogo**

**SC obendang ajanga shirnoki ozing raksartem
kümzüka ayur aji sayur: Rahul Gandhi**



VOL. XXI NO. 86 (ADOK 86)

DIMAPUR

SANGTENNÜ (TUESDAY)

ANJETI (JANUARY) 09, 2024

₹ 5.00

Mizoram CM-i Nagaland deputy CM den ajurutep

Dec 2024 matongdang NE yimtsüing ajak nung tap water agütsütsü



Aizawl, January 8, 2024 (Agencies): Mizoram chief minister Lalduhoma-i Hombarnü Aizawl nung Nagaland deputy CM Y Patton den ajurutepogo.

January 8, 2024 nü Nagaland deputy CM Y Patton-i Aizawl nung Lalduhoma'er kidang pa den ajurutepa liasü.

"Tanü Nagaland deputy chief

minister Pu Y Patton ozü kidangi arua kü den takok anguba salem lemsatepogo" ta Lalduhoma-i ashi.

Idangji tenati Northeast renloka aotsü atema onük aika lemsatep. Tenatisa Mizoram aser Nagaland tsüingda yaritepa mapa balala inyaka aotsü tebilembatem lemsatepa liasü.

Dimapur nung kitsükkirong lendong atalok

Dimapur, January 8, 2024 (TYO): Dimapur nung tanü anüingdang 12:30 ako meta kitsükkirong lendong ka nung ki aika rongdokogo.

Khermahal kiyong nung atalokba lendong nung kibong 7

aliba ki den sofa godown ana tashi mitsü küma rongdok.

Central Fire Station nungi fire tenders 3 den temeket alirtemi mi ensepa liasü ta osang angazükter. Iba lendong nung nisung yiruyibongba osangbo kecha mali.

NPCC-i Nagaland sorkar ajungmesor

Dimapur, January 8, 2024 (TYO): Nagaland Pradesh Congress Committee (NPCC)-i 2024 küm pelashishia agizükba den temoatsü meshiba osang metetdaksüogo.

Bharat Jodo Nyay Yatra nung sensotemi jangrabangra shilem agitsü imlar. Iba sentong ya rongsenketzüng, lokti, tamangba yimsü aser yimtenren temetentem atema agitsü ta NPCC President, S. Supongmeren Jamir-i sangdong ka nung ashi.

Tanü asen lennirtemi Nagaland nung alirtem aser talisa lanurtem tayongzükba aser khurettem atema mebilemstür. Asen lanurtemi state sorkar ketdangsubaren tajung aginür, ta pai ashi.

Iba alizüing ya tebilemstü abenba nisungtem aser Tsüingremi inyaksü tuyuba sülen anidakertemi dang ajungmesoa inyaktetsü. Ochi nung noktaker, tasü tai taser tashishitsü melii inyakba nisungtemi ani nung dang iba alizüing tongtetsü ta NPCC President-i ashi.

"Tanü Nagaland sorkari Naga yimten tebilemstü nung

temulung magütsür. Sorkari election mapang nübortem dang nangzükba amadok ama ajiteter. Nübortemi item tenangzükbatem amadoker alitsü ama lennirtemibo bilema alitsü akok saka nübortemi tebilemstütem ajurudar. Sorkari Naga nung den asayamenüba anentsüla aser Naga yimten latetsü atema tasü aitba aser tenangzükba agiba inyaker ta sayutsüla" ta Supongmeren-isa shisem.

Tanü yimtenren lennirtem ajanga Naga loktiliba nung telemsa adoka lir. Item lennirtemi Naga nung dang nungibo parnok nija ajangzüktsü aser shishilembabaren atema ang tongtipang süa bilemer. Ajisüaka sorkari pei yimtenren tejangraba dang nungibo nübortem taginübatem atema ang inyaksüla, ta paisa metetdaksü.

Naga yimten tebilemstü koktetba ajanga sorkar dak tamang akaba dang masü saka Naga nung tsüingda telongjem adoktsü aser asenok tejakleni aotsü. Anungji sorkari Naga nung dang nangzükba ama mapa küma inyaka aotsüla ta NPCC President Supongmeren-isa ashi.

Jodhpur, January 8, 2024 (Agencies): December 2024 matongdang Jal Jeevan Mission (JJM) ajanga Assam aser Northeast nung aliba yimtsüing ajak nung kilen shia nem tap water agütsütsü ta Union Jal Shakti Minister Gajendra Singh Shekhawat-i ashi.

Assam nungi osangbener kar den sensaksem dang Shekhawat-i Northeast tejakleni aoba atema tenüingsang agütsü.

Assam nung tap water coverage 1.25% dang aliba 69.96% kümogo aser iba ya yimdak kilen lakh 49 jungnüa nem tap water agütsüba lir.

Assam nung kobi melii 70% ajangtsü aser tesem kar nung dry connections amala timtem anepalutsü. Tang aliba infrastructure yanglushiba aser schemes tasentem ajanga iba

JJM tejakleni aoter ta Union Minister Shekhawat-i ashi.

Mizoram aser Arunachal Pradesh nung 98% coverage lir aser Nagaland, Manipur, Tripura o Meghalaya state temia ibaji menepa inyakdar. Külemi meranga inyakba ajanga Northeast ajungalen tarutsü ajungtsü ta paisa ashi.

National JJM ajanga 72% coverage tongogo aser state 9-i kilen ajak nem tap water agütsüdar. Centre sorkari December tashi nung 100% coverage alizüing ayuba atongtsü, ta Shekhawat-isa metetdaksü.

Iba alizüing ya takümsa atongtsü. State aika nung JJM mapa inyakba nung tzü peria manguba den külemi khuret balala ajurua arudar. Ajisüaka Centre aser state sorkartem külemi yaritepa item

tayongzükbatem koktettsü ta paisa shisem.

Tang tashi nung Jal Jeevan Mission (JJM) ajanga yimtsüing nung alir kilen crore 14 nem tap water connections agütsüogo.

Tang tashi nung yimtsüing nung alir kilen 72% tongogo aser iba ya Mission tenzükter küm pezü tsüingda nung inyaktetba lir ta Ministry of Jal Shakti-i metetdaksü.

Iba Mission ajanga linük nung school lakh 9.24 aser Anganwadi centres lakh 9.57 nung tap water supply agütsüogo ta Ministry-isa ashi.

Tang yimtsüing lakh 2 aser district 161 tashi 'Har Ghar Jal' kübok lira ser iba ya tetsürtemi anogoshi tzü ataba anendaksütsü atema tenzükba lir ta Ministry of Jal Shakti-isa metetdaksüogo.

Minister Kenye-i Tizu-Zungki project yakta inyaksü mepishi

Kohima, January 8, 2024 (TYO): Power and Parliamentary Affairs Minister KG Kenye-i Centre sorkar dang National Waterways 101 Tizu-Zungki project mapa küma inyaksü mepishiogo.

Cruise Vessel Ganges Queen, Kolkata nung mezüingbuba Inland Waterways Development Council senden nung Kenye-i iba temepishia agüja liasü.

Iba senden ya Union Minister for Ports, Shipping & Waterways and Ayush Sarbananda Sonawal

menden ser amen aser state o Union Territory balala nungi ketdangsurtem aden.

Nagaland ya Myanmar den arrtsütepa state ka lir aser ali agi dang meketbanga lir anungji Inland water transport nüngdaker ta Minister Kenye-i ashi.

Centre sorkari 'Look East Policy' tenzükba lir anungji Ministry-i Tizu-Zungki project tekarakba nung inyaksü mepishir, ta paisa ashi.

"Nagaland nung Cargo and

traffic movement atema NW 31 Dhansari nung Techno Economic lenmangtem bushitsüla aser water tourism ajungkettsü atema Doyang reservoir dam anepalutsü nüngdaker" ta Kenye-isa shisem.

Iba senden nung Minister Kenye den Transport Department Secretary Dr. Zasekuolie Chusi, Addl. Secretary Sentiwapang Aier, OSD Transport Myingthungo Ababe Ezung aser DGM NST Thomas Y Kiutsangmong nung aden.

KMC-i Kohima nung Viksit Bharat Sankalp Yatra agi



Kohima, January 8, 2024 (TYO): Kohima Municipal Council (KMC)-i Hombarnü Old NST aser Indoor Stadium Officers' Hill nung Viksit Bharat Sankalp Yatra sentong ka ayonga agiogo.

Iba sentong nung departments, banks aser Post Office nungi ketdangsurtemi Central aser State sorkar scheme balala indang osang metetdaksü. "Sorkar scheme

matongertem atongtsü atema iba sentong ayonger. 2047 küm tashi nung India renloker alitsü atema iba mapa inyaker" ta KMC administrator T. Lanusenla Longkumer-i ashi.

Laisa shilem agirtem nem Viksit Bharat Sankalp (pledge) agidaksü.

Iba sentong nung PMJAY aser CMHIS dena scheme balala atema on-spot registration agi aser vouchers alem.

Sentong nungsa Pradhan Mantri Awas Yojana (Urban), Swachh Bharat Mission (Urban) aser PMSVanidhi (micro-credit scheme for street vendors) scheme kübok beneficiary temi parnok ajangzükbatem osang lemsatep.

Maneni Prime Minister Narendra Modi-i Viksit Bharat indang osang lemsatepba den Nagamese oshi nung scheme balala osang sayua liasü.

MoS Krishan Pal Gurjar-i Niuland semdang



Dimapur, Aenjeti/January 08 (TYO): Union Minister of State for Power & Heavy Industries, Krishan Pal Gurjar-i January 6, 2024 nü Niuland semdanga district ktdangsur, NGOs, nübür lenirtem aser Centrally Sponsored Schemes balala nungi teyari angurtem den senden mena liasü.

Iba senden nung jembidang, Ato Kilonser Narendra Modi kübo central sorkari North East region terenlok asoshi temulung tali agütsür aser iba yongji pai region aiben semdangogo, ta MoS Gurjar-i ashi.

Minister-i Centrally Sponsored Schemes balala nungi teyari agirtem den sensaksema liasü aser district nung item scheme mapa kuma inyakba nung temulung asüba lemsatepa

liasü. Power sector dak sendakba nung jembidang India ya power surplus linük ka kumogo aser state nüngdakba power ajak central sorkari agütsütsü, ta Gurjar-i ashi.

Nüngdakba raw materials dang lira industry mashi amenoktsü asoshi state sorkari nungi proposal bener aruba agizüktsü central sorkar renema lir, ta minister-i ashi.

Niuland district kübok Hovukhu yimdak 5MW Solar plant ya tekeraba nung renemtsü aser iba yagi state nüngdakba agütsütsü, ta pai ashi. Par teloki Hovishe yimdak terenlok mapa balala inyakba semdanga liasü.

Minister, PHE & Cooperation, Jacob Zhimomi-ia iba sentong nung jembidi aser

central sorkari state nung terenlok mapa balala inyakba atema pelaba lemsatepa liasü.

Item project tem rongnung 4-lane lenmang aser Shoxuvi railway station renemba indanga pai ashi.

Pai Union Minister of State dang state nung ano project tali bener arua inyaktsü mepishia liasü.

Deputy Commissioner Niuland, Sara S Jamir-i pela agizükba o jembidang, district nung central minister mezüngbuba agizükba ya nübürtem asoshi tia taka lir, ta ashi.

Niuland ya district tasen ka asünung lenla balala nung terenlok nüngdaker, ta lai ashi.

Iba sentong ya ADC Niuland, S Athsangla menden sür agia liasü.

NBSE ajanga e-Cigarettes nokdangtsü metetdaksür

Dimapur, Aenjeti/January 08 (TYO): Ministry of Education, Department of School Education and Literacy, Government of India nungi shiti ka aruba ama, NBSE kübok register süa aliba school ajak dang Prohibition of Electronic Cigarettes (Production, Manufacture, Import, Export, Transport, Sale, Distribution, Storage and Advertisement) Act 2019 nung mela aliba ama Government of India-i nübürtem anema alitsü mechi electronic cigarettes (e-Cigarettes) aser oset tem nokdang, ta Nagaland Board of School Education (NBSE) sangdong ka ajanga ashi.

Electronic cigarettes ya

talisa tanurtem asoshi temang nung timtem tulu agütsür aser item oset ya online stores mesüra local vendors ket nung angur, koba tebilemstü tulu kumogo, ta sangdong ajanga ashi.

Item oset ya kakete reju anasa convenience mesüra stationery stores tem nung ayoker aser iba yongji tanurtemi mela-mela angur, ta ashi.

Anungji Heads of Registered Institutions ajungai tapet mera agia kaketshir aser tesayur nem electronic cigarettes ajanga temang nung timtem agütsüba aser electronic cigarettes nokdangba indang angatetdaksütsüla, ta NBSE sangdong ajangasa ashi.

ADC & ERO Dimapur ajanga metetdaksür

Dimapur, Aenjeti/January 08 (TYO): Additional Deputy Commissioner & Electoral Registration Officer, Dimapur, Mhalo Humtsoe-i sangdong ka nung ashiba agi, 01/01/2024 ya qualifying date ka ama Photo Electoral indang Final Publication ya January 10, 2024

anüngdang 11:30 ako nung Deputy Commissioner, Dimapur indang Conference Hall nung sayatsü.

Anungji iba Final Publication nung nüngdakbapur ajak medema arua adentsü ayongzüker, ta sangdong ajangasa ashi.

Bhandari SDPDB senden nung terenlok maparen indang jembidi

Dimapur, Aenjeti/January 08 (TYO): Bhandari Sub-Divisional Planning and Development Board (SDPDB) sebdeb January 8, 2023 nü MLA aser Chairman, Bhandari SDPDB, Achumbemo Kikon lenisüba kübok Bhandari nung ADC indang Conference Hall nung mena liasü.

Iba senden nung EAC Champang kübok Mitchü Yan yimtsüng recognition atema jembidang, iba yimtsüng sorkari agizüktsü ya mapang talangka nungi temsüa lir, kechiaser iba yimtsüng ya 1974 küm kumtet aser nüngdakba maparen ajak Home Department nem agütsüogo, ta Secretary, Core Committee for Mitchü Yan Village formation ajanga ashi.

Parnoki iba yimtsüng recognition inyakyim bhukumer aser NOC bushitsü nüngdaker, ta jembia liasü.

Parnokisa Yanmhon Village area ya 'SDPDB Aspirational Area' ama tang financial year kübok adopt

asütsü pangjema liasü.

MLA Achumbemo Kikon-i nübürtem züktsü tebilemba aliba aser talisa education, health aser road sector nung tali rangloker inyaktsü tebilemba lir, ta iba senden nung ashi.

Janjanteta aliba aspirational area tem nung tali rangloksü aser yangji yimtsüng 17 dena lir, kong rongsenketzüng aser nübu peria lir, ta pai ashi.

Pai ktdangsur aser department balala dang putu menden den amteper item yimtsüngtem ajangzüktsü asoshi terenlok mapa inyaktsü ajungshia liasü.

Iba senden nungsa Bhandari nung helipad ka nüngdakba indang jembidi aser iba ken o Transport Department aser Civil Aviation dangi abentsü renema ayu.

Zünger mapa mangu aliba lanurtem atema sorkari senotsü scheme aser policy balala yanglua aliba indang jembidang, Bhandari nung zünger mapa mangu aliba lanurtem arua item maongka agitsü

atema ajungmesotsü aser awareness agütsütsü jembia liasü.

MLA Achumbemo-i Wokha nung aliba bank manager tem dang sorkar-i shia aliba ama teyari agitsüpur shimtsü ajungshia liasü. Sub-division nütsting yongsük den apert Bhandari nem beneficiaries lemsüktsütsü, ta paisa ashi.

Champang nung tang shibanga aliba SBI branck ya nübürtem asoshi tanaben lapoktsü nüngdakba indanga senden nung jembia liasü. Foothill area nung aliba Longayim aser Mekirang yimtsüng nung power connection asoshi teloki yimtsüng ana dang department-i mapa metenzük dang nübürtemi nüngdakba mera agitsü ajungshia liasü.

Iba senden nungsa Additional Deputy Commissioner Bhandari, Longdiba L. Sangtam aser sub-division nung tasen aruba ktdangtsürtem Bhandari Sub-Divisional Planning and Development Board nung pelashishia agizüka liasü.



Assam Rifles temi anibelem mesasai meranga inyakba ajanga Mon district kübok Aboi nung NSCN-K (Angmai) züngsem ka temai adoka liasü, shiba 2023 küm June ita nungi iba tesem nung kanga teyakyak liasü.

NBSE-i Clases IX & X atema Smart Textbooks yanglua lir

Dimapur, Aenjeti/January 08 (TYO): Nagaland Board of School Education ajanga Heads of Registered Institutions aser stakeholders ajunga dang sangdong ka nung ashiba agi, tangazükba nung tajangshiba balaka alitsü aser kaketshirtemi tajungba nung angazüktsü mechi academic session 2024 atema Classes IX aser X asoshi Mathematics aser Social Sciences subject tem indang textbooks tem QR Code technology dener menünga lir.

Item textbooks nungya topics, sub-topics, activities, tatishitsü aser tasüngdangba shia atema QR Codes balaka menünga lir. Item QR Codes ya scan asüba ajanga kaketshir temi video tem ajanga rasaa ashiba mashi mapang reprangtetsü.

Item kakete dang Smart Textbooks ta ajar aser item yagi kaketshir mashi mapang, tesem mashi nung angazükba nung yaritsü aser kasa mapang resources tali agütsütsü tesayur

nem tashi agütsür.

QR Codes amshiyim ya tongmelang aser lenla balala nung amshiteter aser National Education Policy (NEP) 2020 nung shia aliba ama curriculum nung technology meyokteptsü nükjidong nung lir, ta ashi.

Iba yagi kasa mapang digital literacy renloksü aser asen tanurtemi concept tejangja angateta technology amshiba tarutsü asoshi renemtsü, kong subject tem nung digital skills aliba ajanga parnok nükjidong angatetsü. QR codes tem amshiyim totuyuba tejangja textbooks nung agüja lir.

Anungji Heads of Institutions ajaki secondary level Mathematics aser Social Sciences atema Smart Textbooks indang osang kaketshir, tesayur aser tsürabor tem dangi prokshia sayuba aser angazükba tali tajungba akumtsü asoshi item digital resources amshitsü ajungshir, ta NBSE sangdong ajangasa ashi.



Agartala, January 8: Agartala nung Content synergy of Akashvani for capacity building indang North east Zone anogo ka workshop agia liasü, koba Principal Director General of Akashvani & News Services Division, Dr. Vasudha Gupta-i moatsü. Iba seAntong nung northeastern states nungi Part Time Correspondents (PTCs) aser Akashvani nungi ktdangtsürtem dena liasü. Nagaland nungia Regional News Unit (RNU) Head Kohima, Asono-i anir oa dena liasü.



AAP candidate Swati Maliwal, Narain Dass Gupta & AAP leader Sanjay Singh nung taruba Rajya Sabha elections atema nomination papers benokba mapang tangokba noksa nung angur.

SC obendang ajanga shirnoki ozüng raksartem kümzüka ayur aji sayur: Rahul Gandhi

New Delhi, Aenjeti/January 8 (Agencies): Gujarat sorkari Bilkis Bano ken o nung aija tepuokdak yur alir nisung 11 nem taitok agütsüba anema Supreme Court-i obendang agütsüba dak sendakba Congress lenir Rahul Gandhi-i Hombarnü BJP aitsüogo aser ashiba agi, obendang ajanga shirnoki ozüng raksartem kümzüka ayur aji sayur.

ashiba den parnok ya hopta ana tsünga tepuokdaki meyipa yoktsü ozüng agütsüogo. Justices B V Nagarathna aser Ujjal Bhuyan nati kumtetba bench kati, Gujarat sorkari meblem dangi inyakogo ta ashiba den, tetsür anema ozüng dak alema mapa tamajung benshirtem nem taitok agütsütsü langa ali asü ta asüngdang. Ghandi-i X sabang ajanga, "election nung tajangzük angutsü atema ochi obendang tepsettsü merangba ya democracy atema kanga lendong lir. Tanü Supreme Court obendang ajanga linük nung shirnoki ozüng raksartem

nem taitok agütsür aji tali jangjaogo," ta ashi. "Bilkis Bano-i anibelem mesasai raraba ya BJP sorkar anema ochibai takok anguba temaitsü lir," ta taoba Congress tir yagi ashi. 2022 küm February ita Gujarat nung mepetmesü adokba mapang Bilkis Bano ya telok kati tashiyim agi raksatsü. Iba mapang la arishi küm 21 tain aser ita pongu mashisa liasü. Lar arishi küm asem jala densema lar kinunger tenet tashi iba mapang tepseta liasü. Iba ken o nung aija alir 11 prongla nem Gujarat sorkari 2022 küm August ita 15 nü taitok agüja liasü.

Congress-i INDIA den menden lemsateptsü atema sensaksem tenzükogo

New Delhi, Aenjeti/January 8 (Agencies): Congress party-i INDIA bloc den menden lemsateptsü atema Deobarnü sensaksem tenzükogo. Congress-isa, Lok Sabha constituency kar atema Telangana Chief Minister A Revanth Reddy densema Telangana, Karnataka aser Jharkhand nung minister tem aser taoba mapang minister aser MP tem aika coordinator ama shimogo. Congress indang national alliance committee züngsemtemi RJD lenir Manoj Kumar Jha den Bihar nung menden lemdangtsü atema ajurutea sensaksemogo. JD(U)-i Congress dang parnok menden 16 msüra 17 nungbo toktepner aser tanungba mendentem atema RJD, Congress aser Left pur sensaksemang ta shiogo. Sources balala ajanga ashiba agi, RJD-i Congress nem Lok Sabha menden pezü aser Rajya

Sabha menden ka agütsüogo. Ajisüaka Congress state unit-i menden ti meshia arudar. Source-isa, Congress alliance committee-i AAP lenir Atishi, Sandeep Pathak aser Saurabh Bhardwaj nung den ajuruteptsü ta shiogo. Kasa mapang nung Congress-i Lok Sabha constituency 539 atema Parliamentary coordinator tem shimogo, ajisüaka state kong parnok kija tokteptsü ali item state tem atema lenir tejentem shimogo. Anungji Telangana nung Chief Minister Reddy, Chevella aser Mahabubnagar menden atema coordinator kumdaktsüogo, koba tang TRS ket nung lir. Deputy Chief Minister Bhatti Vikramarka Mallu-i Secunderabad aser Hyderabad achaayangtsü. State minister tem ajak Lok Sabha menden tanungba atema coordinator kumdaktsüogo. Karnataka nunga Chief

Minister Siddaramaiah aser Deputy Chief Minister D K Shivakumar na dak alaka state minister H K Patil, K H Muniyappa, M B Patil, Priyank Kharge, Madhu Bangarappa, K J George, Dinesh Gundurao, G Parameshwar aser Krishna Byregowda nung ajak coordinator kumdaktsüogo. 2019 küm Congress-i Karnataka nung Lok Sabha menden 28 nungi ka dang koka liasü. Jharkhand nunga state minister Badal Partalekh, Banna Gupta, Rameshwar Oraon aser Alamgir Alam nung shimogo aser Maharashtra nunga taoba Chief Ministers Ashok Chavan aser Prithviraj Chavan, Maharashtra Legislative Assembly nung Opposition lenir Vijay Wadettiwar, lenir tejen Balasaheb Thorat, taoba minister Yashomati Thakur, Nitin Raut aser Amit Deshmukh, aser Rajya Sabha MP Rajani Patil nung shimogo.



MP Assembly, Bhopal nung Madhya Pradesh Assembly Speaker Narendra Singh Tomar-i achaayanga MLA Kamal Nath tenangzüktepba agiba noksa nung angur.

India-i Maldives indang envoy jaok

New Delhi, Aenjeti/January 8 (Agencies): Maldives nung ruling party nungi lenirtem kari Ato Kilonser anema jembiba atema India-i Hombarnü Maldives envoy jaoka iba ken o kanga süoki ia agiba lemsatepogo. Social media nung tashishitsü aketba ken o lemsatepba atema Maldives sorkari deputy minister asem mapa nungi anentsüba sülen envoy ya jaoka liasü. Maldives sorkarisa item lenirtem tebilemba aser Male nung administration tebilemba khenyongi balala lir ta shiogo. Ken o jangja alirtemi ashiba agi, external affairs ministry-i Hombarnü Maldives high commissioner Ibrahim Shaheeb jaok aser Maldives nung minister temi Ato Kilonser anema jembiba ya kanga süoki ia agir ta metetdaksüogo. Kasa tebilemba ya Deobarnü Male nung Indian high commission-i Maldivian foreign ministry nem metetdaksüogo. Tir Mohamed Muizzu shiba China pusemer ka lir, pa lenisüba nung sorkar kumtetba sülen Hombarnü tatalokba ajanga India aser Maldives na tesendaktep tamajungba akümba sayur. Taoba küm November ita office mapa belenzükba sülen

Muizzu-i India dang Maldives nung helicopter ana aser tayimtsü ka operate asütsü atema yoka aliba Indian military personnel 77 agintsü atema tetuyuba agütsü. Muizzu-isa "India First" policy magizüker aser bendanger military kecha magizker. Ato Kilonser Narendra Modi-i tawa Lakshadweep semdangba sülen hopta tatemi deputy minister tem densema Maldives nung lenirtemi social media ajanga Lakshadweep ya alima penzürtem mongjen ta ashiba post tem nung parnok tebilemba lemsatepba sülen iba mepetmesü ya tenzük. Maldives sorkari mezüngbo item lenirtemi parnok tebilemba lemsatepba dak sendakba nung kecha telangzüba magütsü saka mapang tatsüka lir youth empowerment, information aser art indang deputy minister, Malsha Shareef, Mariyam Shiuna aser Abdulla Mahzoom Majid nung mapa nungi anenja liasü. Modi-i Lakshadweep semdangba sülen deputy minister asem yagi X sabang ajanga pa aitsü aser ashiba agi, pai Maldives melena Lakshadweep ya-a tanga alima penzürtem mongjen ka ya sayutsü meranger.

Centre-i aluyimertem terenlok atema inyakogo: PM Modi



New Delhi, Aenjeti/January 8 (Agencies): Pai aniba sorkari aluyimertem tebilemstsü bentettsütsü atema lenla ajak nung merangdangogo aser PM Kisan Samman Nidhi kübok beneficiary ajaki sen crore 30,000 agizükogo, ta shia Ato Kilonser Narendra Modi-i Hombarnü ashiba agi, aluyimertem dak sendaka aliba ken o tem nung taoba mapang sorkar nüka kanga mesüa liasü. Ato Kilonser shibai Hombarnü via video conferencing ajanga 'Viksit Bharat Sankalp Yatra' beneficiaries tem den sensaksema liasü, pai ashiba agi, iba yatra nükjidongji temsüa aliba beneficiary tem ajak nem sorkar scheme balala agütsütsü asoshi lir. " 'Viksit Bharat Sankalp Yatra' amenokba sülen beneficiaries tasen lakh 12 shi-i Ujjwala scheme kübok angati gas connection atema apply süogo. Yatra mapang health check-up crore 2 dak tema agiogo aser kasa mapang tsünga nisung

core ka shi Tuberculosis tendangogo," ta pai ashi. "Linük nung aluyimertem aser farm policy indang sensaksema aruogo, ajisüaka taoba sorkar nüka kanga mesüa liasü. Anungji ozü sorkari aluyimertem tebilemstsü tajemba kumdaktsütsü atema lenla ajak nung terenlok asoshi merangdangogo," ta Ato Kilonser-i ashi. "Iba yatra ya sorkar indang dang masü linük indang lir. Iba ya pungmang, timla, bangzüng aser tejangraba Yatra ka lir. Sorkari lokti nung nisung ajak tonga oa scheme balala ajanga sendakteptsü meranger. Vikas Bharat Sankalp Yatra nükjidong tongtibangtibaji, sorkar scheme ajak nem agütsütsü asoshi lir. Anungji onoki sensakertem, tetsürtem, aluyimertem aser lanurtem tarutsü asoshi rangloker inyakdar," ta pai shisem. Viksit Bharat Sankalp Yatra tenzük anogo 50 tsünga shilem agir crore 10 junga alizung tasen ka tongtetogo.



TIR YIMYIM

YIMOBILEM (EDITORIAL)

DIMAPUR SANGTENNÜ, JANUARY (AENJETI) 09, 2024

Putu den apet özüing

Tawa amenba Lok sabha tatar hoho nung India yimten nüchiso mangu dang British nungertemi küm 160 jakdang yangluba özüing 'Criminal laws' asem tashi tasen küma yanglushibaji linük nung özüing yanglurtemi pei mapa meteta temelenshi bener aruba mapa ka asüts. Atangji, tejenba özüing nung amshia aliba olong, oren aser oyim aika kasa lir saka temelenshi kaji özüing tenüing asempronglaji English nung dang küm noklang dak tali amshi arur tang pei tetsü oshi Hindi agi melenogo. Anungji, joko tang nungibo Indian Penal Code (IPC) melena Bharatiya Nyaya Sanhita ta amshitsü, Criminal Penal Code melena Bharatiya Nagarik Suraksha Sanhita ta amshitsü aser Evidence Act melena Bhartiya Sakshya Adhinyam ta amshitsü. Iba dakji alaka özüing raksaba mapatem nung temulung melemtemi apurtem anogo 90 tashi police ket nung ayutsü police nem tashi agüja lir. Ano, tajung kaji tamangba yimsü aser kin kidong tenüing amshia mapa tamajung inyakertem aser lokti ayongteper nisung tepsetba mapatem anema temerenshi tulu agütsütsü asoshi özüing tasenba ajanga özüing amshir aser obendangertem nem tashi agüja lir. India nüchiso mangudang tangar bendanger, British nungertemi India nung merenshitsu atema latetba akhi özüing nung ojang tasüto kata memelenshi küm noklang dak tali amshia aruba özüing melenshitsu apitetba shisatsü aser tangatetbaji junger, kechiyong pei lima nung pei nübertem asoshi tensa mapang apir pei nisungi yangluba temzüing özüing dang putu den apet temzüing özüing asütsü. Ajsüaka tesasaba kaji, tatar hoho nung item tejen özüing asem melena özüing tasen yanglua bener arua benoka jembitsüba mapang tatar senden nungi opposition ajak amato aridoker külenang latetba agi kanga jangramatem bilemer. Ashi, item ama özüing tejen melena tasen latetba senden nung opposition nungia tatar tain aser mongintemi shisalemsatepa shilem agi nungbo, ashiko, tang lateta akaba dang nungi tajungba aser tabensaba nung latetla ta bilemer. Atangji, yimten nung kechi temzüing özüing latetdir latetaka kodanga memelenshitsu temzüing özüing ka masü, saka tarutsü nunga putu tensa den apet yanglushitsu akoktsü. Iba tangatetba nung, opposition mali ser latetaka, tatar hoho nung tatar teimba mulunga latet nungji, temzüing agi melaba ama, joko tang nungibo item özüing tasentemji özüing amshirtemi mapa küma amshia aotsü. Aji oda, özüing tasenba nung nübertema pei temeten atema nokdaksü tashi tuluba angutsü aser özüing amshirtema sademsadema ochi aser shitak obendang bushitetsü imlar. Item teimla dakji alaka, tang linük nung tatar hoho nung özüing tejentem agiener özüing tasen latetba mapa jagi state-tem nunga özüing yanglurtemi temzüing özüing tsütsü temulung agüja bilemdangtsü aser temzüing özüing ajak mapa küma amshitetba aser putu den apet temzüing özüing ayutsü nüngdakba indang shisadanga inyaksü ajungshir. Iba nüngdak indangji kodang bilemdangdir, state-tem rongnung asen Nagaland state nungsa tejen temzüing özüing meyipa repringshir melentsü mesüra yanglushitsu nüngdak teimba repringtetsü. Aji oda, Inner Line Permit tsütsü 1873 küm latetba Bengal özüing amshir aser likalilem tsütsü asen meyong masü Assam meyong amshir. Item dakji alaka Naga nung balalulaba, tangar agi pei chir akümba aser tangar nem senso temeten agütsüba temzüing özüing amala kecha maka pei pei mulungba nung dang temeten amshia arudagi. Aji oda, Nagaland state nung Naga nungertem asoshi Naga nung özüing yanglurtem, tatar yimsüsürtemi laletba özüing aikabo mali. Asenoki India temzüing arla 371 A nung asen Naga nung sobaliba, temzüing özüing, tsüka-oka aser obendangba maparen nung temeten agütsüba indangbo kanga süoki ia jembir saka asenok mangatetep ken o bo India nung Supreme court aser high court nungang jembir aser joko kibalembu dena asen sobaliba nung masü tangar sobaliba amshia obendanger tsüngdang kecha kin kidonga mashishii kibong kümtep tenzükingo. Ibaji asenoki asenok dak apet temzüing özüing meyanglutetba ajanga lir. Atangji, sen yanglutsübajia taküm asoshi tongtibang, saka amtsük kija agi taküm melitet ama, tatar senden nung amener özüing yanglur yimsüsürtemi pei lima aser nübertem dak apet temzüing özüing latettsü merepringtet aser merajem tashi sen akaba kija agibo asenok tejakleni maotsü.

OLEMSABANG

2024 küm ya-a koda lia aotsü sentong yanglur ???

~ L. Kika Pongener.

(Yashi adok nungi...)

Sorkar : 2023 küm otsüsutsü sua asembenbuba 'Opposition maliba Sorkar' yangluogo. Sorkar ka nung opposition malibaji tongtipang shilem ka agi mabensa asütsü. Tatar shirnok rulling sorkar den loktepogo, parnoki opposition maliba sorkar yanglubaji, nujiso bushiba mapa nung tetsükdaksü makatsü atema lokteper ta nuburtem dang shiogo. Ajsüaka, tanü tashi nuburtemi parnoki jembiba ama mapa agi inyakba kecha mangur. Tesasatsüka, asen Naga nung nujiso bushiba mapa ya aposhia-aposhia aposep amai dang küma oadagi. India nungeri asen Naga nung nujiso atema tatemang telemtetba agitsüba ya "Danu-i Koya ngosetsü atema khen ngoshili, khen chiokli ano khen tebang nung mangumer rakshili...ta asayaba amai dang mesushidagi". Aji oda, nujiso bushiba mapa ya kodangang telemtetba ka dangi arutsü'ar nuburtemibo ongo madokteti kümogo. Anungji 'Elected Member'-temi shitakba nujiso bushiba nung tatemang telemtetba ka agitsü atema temulongtetba lir ta sura, parnoki pei amenba menden toktsütsüla (Mass resigned), aser nujiso bushiba ya tatemang telemtetba 'Solution' kati maru tashi Election nung shilem magitsüla. India nung Election nung anidaka shilem agi tashibo, tapu aika jembiyongjia, India nungeri nujiso mapa ya tang amai zübazüba-a dang toktsütsü aser atsülanga aotsü sudi ta nuburtemibo asadangteter. Anungji Political Party ajaki India nung Election nung shilem magitsü telemtetba agitsüla aser yimjak nung yimyim ayimoktsütsüla. Terenlok mapa tsütsü repringdangra, mapa tasen inyaksü long azüingba (Foundation stone layout) aika dang, saka mapa renemer semzüka/lapokba-bo kanga ishika dang. Nubur matsüngdang yimjak nung yimyim ayimoktsüba den mapa inyakba khenyongi meputep. Center sorkar nungi terenlok atema sanction agütsüba-bo aika angur, saka mapa inyababo kanga ishika dang. Terenlok mapa nungdem nung aruba sen agi kar dang takar akümer. Talisa, nujiso bushiba mapa tanü tashi tatemang telemtetba ka magitetba agi temelen saru aser saru-saji tali-tali akümer, aser terenlok mapa inyaksüba nunga tetsükdaksü ajurur. Anungji asen Naga nung Politician-temi anir nutsüing nubur ajaki nujiso mapa ya tatemang 'Solution' ka magi tashi, Election nung shilem magitsü ta tasü-ita shitetsüla aser Election nung Political Party katia shilem magitsüla. Aji oda, iba amaji meinyaktetra, asen Naga nung nujiso ya kodanga tatemang telemtetba ka dangi marutetsü sudi...ta nuburtem-ibo asadangteter.

Election : Taküm April-May tsüingda India lima State ajak nung General Election agitsü amai jembiba osang angazüker. Anungji tang aruya-a aliba General Election nungbo, asen Naga lima nungbo Political Party katia shilem magitsü atema akang-akanga telemtetba ka agitsüla. Iba tangatetba nungji Political Party-tem aser nubur ajunga ka küma longjemer tasü-ita nokdaksüla. Asen kidanger Manipur lima nungbo maparen ajunga nung nubur ajunga longjemer tasü-ita nokdakba agi, parnoki akhangba ajak nung takok anguba asenoki angur, kechiyong parnok-ibo par takhangba mataloktsü tashi taküma dena bendanga agüja tasü-ita nokdaker. Yongji parnoki akhangba ajak takok angur. India temzüing nung pei amangnuba yimsu amangtsü ta liaka, Political Party kobaisa iba temzüing-özüing anema özüing tapu-tapu yanglutsü meranger, item Political Party nembo Khristan-tem aser tanga yimsu amangertem-ibo katia Vote magütsütsüla. India lima ama kin aika meyoktepa aliba linuk ka nung, tamang yimsu ka dang asütsü aser oshi ka dang ayutsü ta temzüing-özüing melenshitsu merangba, Nashi metepsettsü, Azü shi machitsüla, saka Ak, Nabong, Batak, An itemjibo tepsettsüla aser achitsüla...ta tenuk amour, kin kar/telok kar/tamangba yimsu kar dak dang mejetteta rangloker, tanak-temesung bendanga yimsu asütsü merangba Political Party nembo Khristan-tem katia Vote magütsütsüla...ta bilemer. India lima ama tamang yimsu aika meyoktepa aliba linuk ka nung Christmas benjong anogo nung 'Good Governance Day' amongtsü lemtetba aser Deobar anogo 'Temeshi amongnu' teka mapa kecha meinyaki meshiteta amongba anogo nung sorkar mapa tongtipangtem inyaksü lemtetba...Iba ama Political Party nembo Khristan tajungtem-ibo vote magütsütsüla. Aji oda, koba Party-i Indian Constitution nung pei amangnuba tamangba yimsu amangtsü ta zülua aliba, iba temzüing-özüingji melentsü meranger, mesura tanga tamangba yimsu anema inyaker, iba Party nungji Khristan tajungtem-ibo madentsüla...ta nibo angateter. Tawa Mon District Tapi Constituency Bye Election nung, Deobar anogo nung vote azüingtsü lemtetba nung, 99 % Khristan aliba State ka, MLA roker prongla Khristan aliba lima ka nung, Sorkar-i iba anema ola madokba, aser tashi angaa anidakba nung-to nuburtem kanga aoksa-ogo aser lesson ka nguogo. Mizoram sorkar-ibo iba anema ola adokba agi Election Commission-i anogo melenshitsu asenok ajaki küli tejangja nguogo.

Asen Naga nung nujiso bushiba mapa ya-a, India temzüing küpok Election nung tashi anga-a anidak tashibo tang amaisa zübazüba-a toktsütsü sudi...ta nuburtemibo bilemer. Anungji yimsusurtemi anir nubur ajaki shitakba nujiso mapa ya tatemang telemtetba (Solution) ka agitsü meranger sura, tang aruya-a aliba Election nungjibo Party ajaki shilem magitsü telemtetba agitsüla...ta nuburtemibo bilemer. Iba nungji Naga nung ajunga kenbang-obang ka asütsüla. Aji oda, yamaji longjemer nokdakra, nujiso ya tatemang kati teküraba nung arutetsü. Anungji 2024 küm ya sorkar, yimden, arogo, mungdang aser loktiliba ajunga meyipa repringshiba küm ka sudi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

DABA nung Group VBS tenzüker küm 10 abensaogo



Dimapur, January 7, 2023 (TYO): 2013 küm Dimapur Ao Baptist Arogo (DABA) nung Group's Publishing House Ministry USA nungi VBS curriculum bener arua mezüngbuba Group VBS agia tenzüka sülen küm 10 abensaoga atema January 7, 2024 nü Tenüngsang Agütsüba sentong ka ayongzüka agiogo. Iba sentong nung DABA kübok fellowship ajak nungi CEM tanurtemi küm 10 nung VBS Theme Song balala

angazüka aruba nungi shilem agia liasü. Sentong nung DABA Asso. Pastor N. Imtatsüng Imchen-i temoatsü meshia sarasadem, CEM Director R. Asenla Jamir-i Tsüngrem O jemi aser Pastor I. Wati-i Tenüngsang Agütsüba sarasadem shilem agi. 2013 küm tanur 1300 shi ka den CEM Director R. Asenla Jamir lenisüba kübok tesayur 120-i mezüng Group's VBS agia liasü aser iba VBS ajanga

tanurtem tanela nung kanga temoatsü angu. Tanübo DABA CEM tesayur 180 den tanur 2600 shi kümogo aser January 4-6, 2024 tashi SCUBA "Diving Into Friendship With God" ta ser Group VBS 11 buba takok ngua agiogo.

2015 nungi Group's VBS India ta ser Bengaluru nung amenok aser tanü tashi parnok den teka amteper DABA CEM Director ya shisalen sayur ka ama parnoki amshia arudar.

COVID wara mapang VBS magitetsüsa tensa ka ajuru saka DABA CEM-i media ajanga Virtual VBS 2021 Rocky Railways kanga dang takok ngua agia liasü.

2015 nungi tenzüka DABA-i Group VBS India den MoU sign sütepba sülen kümshia Ao oshi nung VBS theme song meyipzüka atener. Iba ya tanurtem dang Ao oshi nung ken sayutsü nükjidong nung tenzüka lir aser tanü tashi takok nung arudar.

Ano 2023 küm Tsüngremer mangdang tasen nung ken dang masü saka VBS Ao theme song video yanglua iba ajanga DABA nung alir tanurtem dang masü saka Arogo aika den lemsatepa temoatsü ngua arudar.

Küm 10 tashi Tsüngrem taochi ajanga Group's VBS kanga dang takok manung agia aruba aser tanü tashi Tsüngremi kanga dang moatsüba atema Tsüngrem nem tenüngsang agütsür ta DABA CEM Director-i metetdaksü.

ANOGO ABEN TSÜNGREM DEN

Tsüngremi ajongli bushir

O Israel kidong, iba poteper amai ni ne den inyaksü makok no? ta Kibubai ashir. Ajiang, poteper ket nung ajongli ama, yamaji nenok kü ket nung lir. Yeremia 18:6

Ner kibong dangi, ne tembar dangi, ner telok dangi aser nenok lima dangi tekümtet bener arutsü Tsüngremi metetta lir. Aji oda shirnoki Pai amshidaksütsü mulunga pei taküm yanglushitsü mulunga pei taküm yanglushitsü mulunga alir parnokji Pai bushir. Ajongliji pa sasa pa atema kecha sentong mali, tenzüksü kecha tejangraba mali mesüra tagütsüba mapa inyaksü kecha nungnanga mali. Ibai ajongli ka dang. Yanglushitsü akokba, amshitetsüba ka dang, master nem bendanga agütsüba oset ka dang lir.

Mapang nung asenoki mulungsoa ashir: "Ni kü tashi, sempet metetogo aser tang ni tajungtiba nung na koda tenzüksü!" Mapang kar nung asenok Pa nem osang agütsür, "Ni kü tashi maittem metetta lir, anungji ni Na asoshi mapa inyaksü makok." Aji saka ibaji ajongli jaklaji masü. Asen tashi den mapa inyaksü asoshi Tsüngremi asen tashi kecha latetta meyutsü (2 Kor. 12:9-10).

Pai aginüba ama Pai asenok yanglutsü akok. Kodang Tsüngremi nungloktsüba mapa nung ajemaluba nungdaker, Pai ajemaluba tenzüker bushir. Kodang Pa mapa nung tejangraba tashi Pai Pa Tanela agi süngtsütsü tejangraba tenzüker bushir. Tsüngremi temeshi marok amshiner, anungji shirnoki pei dak aliba memerükba merüktetdaksütsü mulunga alir Pai item nüburi amshir. Ajongli dang alitsüji tamaren mapa ka masü. Meyushitsü asoshi takoksang Tsüngremi bushiba dak alaka iba nung tebur ajungba aser tepuatsü kecha maket.

Tebu dang Pa asoshi nai kechi inyaksü akok aser kechi inyaksü makok ta Tebu dang ashitsü ne tebilemba lira, Pai bilemba au ta agizükang aser Pai na koma yangluner yanglutsü Pa dang melaang. Ajongli ama. Po ateper na, ni ajongli. Ni bendanga agüja atar ta shiang.

CPC nung Nigeria mezüngokba asoshi Biden administration aitsür



Ethiopian Orthodox Khristan tem linük yimtiba Addis Ababa nung aliba Bole Medhanialem Church nung Christmas amungdang temo milen amer aliba noksa nung angur. Alima nung Orthodox Khristan million 200 dak tema January 7 nü Christmas mungogo, kechiaser parnoki Julian calendar sülen anidaker aser danga Khristanpur Gregorian calendar sülen anidaker. Orthodox Khristan ya timba Europe anüdoklen alir aser aika Russia aser Ukraine nung alir. Saka tang Russia den rara aliba mechi ozüng ka melenshir Ukraine nung Christmas ya December 25 nü mungogo.

Washington, Aenjeti/ January 08 (Agencies): Nigeria nung Khristanpur anema mapa tamajung inyakba aser azüdokshiba mapang shia ajuruaka US State Department-i alima nung tamangba yimsü temeden nung tamajungtiba aibelener linüktem nung Nigeria mezüngokba mechi tamangba yimsü temeden bhukuma nokdakba telok temi Biden administration aitsür.

Tamangba yimsü temeden anema mapa tamajung inyakba mazüoki yutsüba mesüra shilem agiba linüktem indang

Countries of Particular Concern (CPC) ya US State Department ajanga Brehostibarnü sangdonga liasü. Nigeria nung Islamic kiralongrar telok Boko Haram ya "Entities of Particular Concern" nung liaka Nigeria ya küm asemubaba atonga CPC nung madener. 2020 küm Nigeria ya CPC list nung Trump administration ajanga inok, saka Biden administration arur mezüng küm agien.

CPC list nung Nigeria madenba atema ADF International's Global Counsel for Religious Freedom Sean

Nelson-i aitsü aser Hokulbarnü sangdong ka nung, "Danga linük ajunga meyoktepba dang nungi Nigeria nung Khristanpur tamangba yimsü mechi tepsetba timba lir," ta ashi.

"Tamangba yimsü temeden nung aibelenba atema Country of Particular Concern nung Biden administration-i Nigeria ano meinokba atema onok jashir aser temulung anisüngzük mangur. Nigeria nung tapi agi tamangba yimsü temeden anema inyakba asoshi United States-i nokdaksüla," ta Nelson-i ashi.

"Nigeria nung tamangba yimsü temeden asoshi State Department-i mera balaka magitsü tejangja alinung, Congress-i ola adoktsü tongtipang."

State Department-i Nigeria ya CPC nung inoktsü aser Nigeria aser Lake Chad region atema special envoy ka shimtsü asoshi Congress züngsemtem ajungshia taoba ita advocacy group aikati shiti ka züluba nung ADF International ya ka liasü.

Iba shiti nungya Nigeria nung tamangba yimsü temeden anema inyakba indang rasaa shia liasü, aser alima nung tamangba yimsü mechi Khristanpur tepsetba shilem 90 bo Nigeria nungi lir ta ashi.

Iba shiti nungya 2022 küm

tenzüker Catholic putir 100 apuba aser par 20 tepsetba indang shia liasü. Nigeria nung 2009 küm nungi Khristanpur tekülem ki 17,000 nung mi senloktsüba aser aika nung tamangertem lia mi asenba indang parnoki ashi.

Nigeria nung Khristanpur anema mapa tamajung inyakba indang ashiba den külemi sorkari mapa tamajung inyaker memerenshiba indang iba shiti nung shia liasü.

Khristanpur anema mapang shia blasphemy ozüng amshiba ya sorkari anir tamangertem reshikangshiba tatishitsü lir ta iba telok yagi ashi.

Taoba küm kaketshir Deborah Emmanuel Yakubu-i tamangba yimsü mezüngmeshi ta tai tonglokja tepsetba aser Yakubu tepsetba asoshi tejashi lemsatepba mechi Sultan of Sokoto, Sokoto nung Catholic bishop aser tamanger Rhoda Jatau amokmerenba memerenshi yutsü, ta shiti nung shia liasü.

Iba shiti ya Congressional Record nung inoker hopta ana sülen aser State Department ajanga CPC list sayatsü hopta ka lia Christmas matongdang Honibarnü nungi tenzüka Khristanpur 160 dak tema tepseta liasü. Nigeria nung Khristanpur timba aliba tesem

nung ki noklang aika rongdoktsü.

U.S. Commission on International Religious Freedom ajanga 2023 Annual Report nung Nigeria ya list of recommended CPCs nung inoktsü shiaka iba list nung Nigeria madenba atema parnokia jashiba sangdonga liasü.

Nigeria dak sendakba nung onoki ashiba sülen State Department-i manidakba atema congress nung ken o benoka jembitsüla, ta USCIRF Chair Abraham Cooper aser USCIRF Vice Chair Frederick Davie nati Brehostibarnü sangdong ka nung ashi.

State Department ajanga CPC nung Nigeria meinokba atema temeden bushitsü menüngdak, ta USCIRF lenirtemi ashi.

USCIRF ajanga ashiba ama State Department-i CPC list nung Burma, China, Cuba, Eritrea, Iran, Nicaragua, North Korea, Pakistan, Russia, Saudi Arabia, Tajikistan aser Turkmenistan linüktembo inoka liasü, saka parnoki agütsüba linük pungo - Afghanistan, India, Nigeria, Syria aser Vietnam - meinok.

State Department-i Afghanistan nung yimsü asüba Taliban telok ya Entity of Particular Concern nung inoka lir.

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimyim

Shinga

(n) nisung kata masü (nobody)

* Tanü nisung shinga mapai maru.

Shingang

(adj) pi dang nungi tajungba, jangja jangjaa (extra ordinary person)

* Onok rongnung Anungbabo kanga shinganga liasü.

OLONG PAITEP # 6661

	1			2			3		4
5							6		
7			8						
							9		
		10							
11									12
					13				
					14				
15									

TIPLÉN

- 1. Balaka - (5)
- 6. Aika shirangba - (4)
- 7. Tar tatsü - (6)
- 9. Nenü'er jabaso - (4)
- 10. Sen latettsüba - (7)
- 11. Tangar kübok alir - (4)
- 14. Lon nung inokba - (6)
- 15. Tzü ayimdak - (4)
- 16. Ajok - (5)

LANGTSÜNGLEN

- 2. Hai sür inyak - (4)
- 3. Aor tenüng ka - (6)
- 4. Ali telungi talangka lur - (5)
- 5. Tebang kenyongi mazüoker - (4)
- 8. Ken atema anenzükertem - (5)
- 9. Toktepa noktak - (5)
- 10. Sen - (6)
- 11. Benjong agi - (5)
- 12. Telung nung rizünga ayu - (4)
- 13. Tebang nung enok - (4)

OLONG PAITEP # 6660 TELANGZÜBA

TIPLÉN :

- 1. Aben, 4. Artsü, 7. Lisem,
- 8. Liwa, 9. Sarasadem,
- 12. Aket, 14. Mangu,
- 15. Anünü, 16. Anjo.

LANGTSÜNGLEN :

- 1. Aruli, 3. Balala, 5. Suwar,
- 6. Belem, 9. Sүjak,
- 10. Aonung, 11. Dokan,
- 13. Tinu.

NAI-A YA METETTER MA



Apartment complex in Gurugram (Representational)

India nung real estate developer tulutiba DLF Ltd. ajanga anogo asem tsungda Gurugram nung luxury residences 1,113 yokdokogo. Delhi anasa ano yanglu metenzükba mapatong nung luxury apartments ajak yokdok aser 25% shi ka non-resident Indians ajanga alizük. Iba mapatong ya \$865 million project ka lir aser Gurugram nung 116 acres nung yanglutsü. DLF Privana South project nung luxury apartment alizükertem rongnung Google aser American Express nung inyakertem dena lir.

Imphal nung Bharat Jodo Nyay Yatra tenzüksü temelaba mangu



Imphal, January 8, 2024

(Agencies): Taoba Congress President Rahul Gandhi-i Imphal East district nung aliba Hapta Kangjeibung ground nungi January 14 nü Bharat Jodo Nyay Yatra tenzüksüba sentong lir saka iba atema temelaba mangu ta AICC general secretary K C Venugopal (Organisation)-i ashi.

Congress lennirtemi Hombarnü Manipur Chief Secretary Vineet Joshi aser Hapta Kangjeibung ground nungi Bharat Jodo Nyay Yatra tenzüksü atema temelaba agütsütsü mepishi.

Chief Secretary Joshi-i temelaba yakta agütsütsü ta

Congress lennirtem dang langzü.

Congress-i January 2 nü Hapta Kangjeibung nungi Bharat Jodo Nyay Yatra tenzüksü atema sorkar dang nungi temelaba meshia liasü.

Iba Yatra ya political programme mesüra election campaign masü saka tetsürtem, lanurtem, aluyimertem aser sensakertem nem temeten meshia ayongba sentong ka lir ta Venugopal-i ashi.

"Ground amshitsü atema temelaba magütsüi politics meinyaksüla" ta paisa ashi.

Manipur state Congress president Keisham Meghachandra Singh aser taoba Chief Minister Okram Ibobi Singh (2002-2017) den külemi

Venugopal-i osangbenertem dang iba osang metetdaksü.

"Ni Kerala nungi lir. Kerala nungertemi Manipur tensa atema süngmanger. Manipur-i temeten nungdaker aser iba jagi idak nungi Yatra tenzüksü. Onoki Manipur tarutsü tajungba kümdaksünür aser state-i taneptsü nungdaker" ta Venugopal-isa shisem.

Manipur nung tenzüksüba sülen Yatra ya Nagaland, Assam, Arunachal Pradesh aser Meghalaya süitsü aser state 15 nung kilometre 6,500 senzür Mumbai atongtsü.

Rahul Gandhi-i yaküm Bharat Jodo Yatra ta ser agia liasü aser iba mapang Kashmir nungi Kanyakumari tashi kilometre 4,500 sema senzü.

Aizawl Bypass Tunnel project atema Rs. 1313.28 crores lemsüksü

Aizawl, January 8, 2024

(Agencies): Union Minister of Road Transport and Highways Nitin Gadkari-i Twin Tube Uni-directional Aizawl Bypass Tunnel project atema Rs. 1313.28 crore lemsüksüogo.

New Delhi nung Union Minister Gadkari aser Mizoram Chief Minister Lalduhoma na senden amenba sülen iba osang metetdaksüogo.

Lalduhoma-i Gadkari den

ajurutepdang Mizoram nung gari lenmang mapatongtem indang jembi. Idangji Lalduhoma-i Gadkari dang Ministry of Road Transport and Highways (MoRTH) kübok mapatongtem tekaraba nung inyaksü aser National Highway Infrastructure Development Corporation Limited (NHIDCL) ajanga lipoküm raksatsüba indang ashi.

Mizoram Chief Minister-i

lemsatepba sülen Nitin Gadkari-i Twin Tube Uni-directional Aizawl Bypass Tunnel atema Rs. 1313.28 crores lemsüksüba ashi.

Sen ajanga Sairang aser Phaibawk tsungda National Highway No. 6 nung 2.5 km tunnel aser 2.1 km approach road ka yanglutsü.

Aizawl Bypass Tunnel ajanga Aizawl nung traffic congestion ajema akümtsü imlar.

Assam-Mizoram CM temi arrtsü ken o jembitsü

Guwahati, January 8, 2024

(Agencies): Assam aser Mizoram chief minister tem tan ita ajurutepa arrtsü ken o jembiteptsü akok.

Mizoram CM Lalduhoma-i Assam CM Himanta Biswa Sarma den ajurutepa arrtsü ken o lemsateptsü.

North Eastern Council (NEC) plenary session agitsü aliba nung tena ajuruteptsü akok.

January 19 nü Meghalaya yimtiba Shillong nung North Eastern Council (NEC) plenary session alitsü sentong lir.

North Eastern Council (NEC) plenary session ya union home minister Amit Shah menden ser amentsü.

"Lennir anati arrtsü ken o angatetteptsü atema onüktem lemsateptsü" ta Mizoram sorkar ketdangsür kati ashi.

Mizoram aser Assam tsungda July 2021 nungi tenzüka olemtep aiben agia arur aser arrtsülen tensa süngjema ayutsü mulungtepa lir.

Assam aser Mizoram tsungda kilometre 164.6 agi arrtsütepa lir.

Assam aser Mizoram tsungda 1875 aser 1933 nung colonial demarcations anaben asüba ajanga arrtsü mangatettep adok.



Kamjong district nung Assam Rifles sepaitemi Myanmar nungi Manipur tashi gari asem nung bener aruba kozüjang bosta 330 apu. Parnoki apuba kozüjang indang jenjangji Rs. 3.168 crore (international market rate) shi liasü ta ketdangsürtemi ashi.



Paris nung Charlie Hebdo indang office nisung nisung 12 tepseter küm trok ajungba anogo nung Charlie Hebdo publication director, cartoonist aser writer Laurent Sourisseau (tesülen tiyong nung nokdaka aliba), shiba dang Riss ta ajar, pai asür bilemteta akhum agütsüdüng tangokba noksa nung angur.

Pakistan nung police ketdangsür pongu pokset

Islamabad, Aenjeti/January 8 (Agencies): Northwestern Pakistan nung polio vaccination drive ka oya aliba mapang police ketdangsür pongu pokset aser nisung 20 dak tema yirua liasü.

Ketdangsürtemi Al Jazeera dang ashiba agi, iba lendong ya Hombar anepdang Afghanistan den arrtsü nung aliba Khyber Pakhtunkhwa province kübok Bajaur tesem nung tawa Pakistan-i ayongzüka agia aliba vaccination campaign mapang ataloka liasü.

Lendong nung yirur alir nisung pongu temang kanga mejungi lir aser parnok Bajaur nungi km 133 pilar aliba province yimtiba Peshawar-i anirogo.

"Police team ka vaccination

drive atema Hombar anepdang yakta oya aliba mapang parnok mena aliba gari pokdakja liasü. Onoki yirur alirtem Bajaur nung local mozükitemi anirogo aser temang kanga mejungi alirtem Peshawar-i anirogo," ta provincial rescue services otongdar Bilal Faizi-i Al Jazeera dang ashi.

Iba bomb pokdaktsüba indang telok kati danga nangzüka mali.

Küm ishika tsüngda Pakistan Taliban, shirnok dang TTP ta ajar parnoki Pakistan nung polio vaccine agüja senzürtem aser security ketdangsürtem aika tepsetogo.

United States indang intelligence agency CIA-i

Osama bin Laden bushitsü atema vaccination drive taila ka ayongzüka agiba sülen Pakistan nung polio immunisation drive anema nokdaka arudar.

Pakistan-Afghanistan arrtsü nung tamangba yimsü lenirtemia vaccine nung Islam yimsü agi tenokdangba agütsür aliba akshi aser yi densema lir ta osang tai prokshia liasü.

Alima nung Pakistan aser Afghanistan na nung dang wild poliovirus type 1 (WPV-1) tashidak mesamai lir.

Polio tashidak nungi jenboa lir ta linük ka sangdongtsü atema küm asem atonga WPV-1 transmission mali ta sayutsüla, ta Global Polio Eradication Initiative-i shiogo.

Russian missile ajanga nisung 11 tepset: Ukraine

Kyiv, Aenjeti/January 08 (agencies): Ukraine anüdoklen Russia nunger missile ka ajanga tila tanur pungo densema nisung 11 tepset, ta ketdangsür temi ashir.

Donetsk region nung Ukraine nunger kübok aliba Pokrovsk jila nung S-300 missiles khaloktsü, ta regional governor-i ashi.

"Tsükchir temi pei ajungtsü dang bilema civilian tem dak amaker aser akok tashi nüburttem nem timtem agütsütsü meranger," ta Governor Vadim Filashkin-i

Telegram post ka nung ashi. Ukraine Tir Volodymyr Zelensky-i nikongdang video ka ajanga jembidang, Russian sepaitemi nüburttem aliba tesemtem nung tenük yoker amak, ta ashi.

Iba ama amakba atema Russia-i timtem angatetsüla, ta pai ashi.

Russia-i tang tashi telangzüba agüja mali.

Pokrovsk ya Donetsk yimti north-west tsütsü kilometre 70 shi pilar lir. Donetsk yimti ya Russian sepaitemi amokbanga lir.

Rara metenzükdang

Pokrovsk jila nung nisung 60,000 shi liasü. Lendong lir ta tekum dangtsü shiaka nisung karbo iba tesemi meyipa shilanger.

Iba jila nung taoba küm August ita Russia-i missile ka khaloktsüba nung nisung toku asü aser aika yirua liasü.

Moscow-i tayimtsü amshia tesashitiba amak tenzüka sülen Ukraine sepaitemia arütsü alema oa Russia nung drones 70 dak tema yoka amak aser iba yongji Russia south-west tsütsü Belgorod yimti nungi nüburttem ainshia liasü.



Sagain region kübok Khampat jila anasa Kanan yimtsüng nung Myanmar mitkari tayimtsü amshia amakdang tepsetba nisung tasümang sü agi meyipanger aliba noksa nung angur. Linük northwest tsütsü democracy bhukumer tem kübok aliba yimtsüng ka nung Myanmar mitkar temi tayimtsü amshia amakdang tila tanur toku densema civilian 17 tepset ta ashir.

Japan menoknok nung asür nisung 161 jungogo

Shika, Aenjeti/January 08 (Agencies): Japan nung menoknok tesashi anokba nung Hombar nung tashinung asür nisung 161 jungogo aser rer alaba mechi teyari maparen junga meinyakteter aser nisung meyrirjang aika tang tashi teyari monguteti lir.

Central Ishikawa region nung January 1 nü menoknok magnitude 7.5 anoka ki o jen laodakja kitsük kirong lendong aser tsunami adokba sülen tang tashi nisung 103 samaba monguteti lir. Hopta ka sülen nisung 2,000 jungnüa teyari magiteti lir aser Noto Peninsula nung anentsüh tesem 1,000 shi nung alua lenmangtem raksatsü.

Iba region ya snow agi lapanger lir aser tesem kar nungbo Deobar aonung snow ya centimetres 10 dak tema tsüka ketdangsür tem asoshi tetsükdaktsü agütsür.

Anogo aika tzunglu aruba ajanga anentsüh ano maneni alitsü akok aser snow sashia aliaba ajanga ki tali laotsü, ta regional sorkari tekum dangtsü ashi.

Hombar nung Ishikawa region nung kilen 18,000 shi electricity mali liasü aser Deobarnü kilen 66,100 dak tema nung tajemtsü

tzü maka liasü. Sorkari yangluba süki nung nisung 28,800 jenoka lir aser aika tajemtsü tzü, electricity amala peria mali.

"Kechi südir süaka iba lendong dak sendakba nung asü-amaba nokdangtsüla. Sorkari achayanga alidak jenoka alirtem tia tajungba kumdaktsüner," ta Ishikawa governor Hiroshi Hase-i osangbener dang ashi.

"Teinyaktsü mezüngbubaji ki o jen agi nembanga aliba nisungtem kumzüktsü aser meta talang nung alirtem tonga aotsü ya lir," ta Ato Kilonser Fumio Kishida-i Deobarnü shia liasü.

Meta talang nung alirtem atongtsü mechi sorkari police aser fire department helicopters aser sepai kar tetsüng agi yoka lir, ta pai ashi.

Japan nung küm shia menoknok noklang dak tali anoker, saka küm aika kisü-jensüba yimba balaka amshiba ajanga teraksa kangabo majurui lia aru. Iba linük nung 2011 küm menoknok tesashi ka anoka tsunami adokba ajanga nisung 18,500 shi asü mesüra samar lir aser Fukushima plant nung nuclear lendong ajurua liasü.

Sheikh Hasina-i kümsük pongububa election kokogo



Dhaka, Aenjeti/January 8 (Agencies): Sheikh Hasina tang agi pongubenbuba Bangladesh Ato Kilonser kümogo. November ita election agitsü sangdongba mapang nungi lar party-i election akoktsü ta jangjar liasü, kechiyong opposition party tongitemi election nung shilem magitsü telemtetba agi.

Hasina-i aliba Awami League (AL) party-i menden 222 akokba sülen tanabuba jenjang nung political party temeja ka masü saka independent candidate tem liasü aser parnoki meden 63 akok, aser iba ajanga opposition party tejangja ka makai kümogo.

Tang aliba opposition Jatiya Party-i menden 11 dang akok, ta Election Commission-i metetdaktsü.

Independent candidate tem ya timba AL-i sentokertem lir, saka alima dang election ya toktepa agiogo ta sayutsü atema parnok dang "dummy candidates" ama nokdaktsü

atema AL party lenirtemi asüngdanga liasü.

Opposition party tongtiba Bangladesh Nationalist Party (BNP)-i, Hasina indang administration kübok masü saka neutral entity ka kübok election aginüa liasü aser parnoki election nung shilem magitsü atema telemtetba agiba sülen Deobarnü agiba election ya Hasina maneni PM kumdaktsütsü atema formality ka dang liasü, ta analysts temi ashi.

Anüolen aliba linüktemi Hasina-i aniba sorkar dang kecha tetsükdaktsü makai sadem sadem election agitsü atema nongshiba sülen vote agütsürtem kwika asütsü ta bilema aliba analysts temisa lemsatepa liasü.

Deobarnü 4:00 ako nung election tembangba sülen Election Commission (EC)-i vote agütsür shilem 40 liasü ta metetdaktsü, ajisüaka aikati iba dang nungi tajemba asütsü ta bilemer.

2 Buba Longmisa Citizens Football Tournament marok Zillion United FC-i benogo



2 Buba Longmisa Citizens Football Tournament nung Champion Zillion United FC den Tetushi tejaoker Asst. Engineer, CAWD Er. Satemtemsü aser Longmisa Village Council Chairman Wb. Merensosang nunger külemi tangokba noksa angur.

Mokokchung, January/ Aenjeti 8 (TYO): Longmisa yimtak Wholistic Development Board teloki January 4 nungi tenzüka January 8 tashi ayongzüka akaba 2 Buba Longmisa Citizens Football Tournament tanü tembangogo.

Tanü iba asayamung tatembangbuba sentong nung Tetushi tejaoker Asst. Engineer, CAWD Er. Satemtemsü-i jembidang asayartemi temulung agüja taküm timi amshiteta bendanga agüja asayara takok angutsü lenmang sadema lir aser nükjidong tongteter, ta asayartem ayongzüük.

Tetushi tejaokerisa lemtamartemi asaya balala nung nisungeri mamangtsüsa shilem agiteta takok tulu nguteter, tanü yangi Longmisa Citizens Football Tournament nung asayartembo lemtamatar kata mali, aji asünung nenoki tajungtiba nung shilem agiteta temaba jenjang nung asayartettsü mangdang uang, ta asayartem ajungshia ashi.

Alima nung nungtügo asayar

Messi aser Ronaldo nungera asoajen kecha balakabo masü saka parnoki bendanga agüja timtem arema mangdang yur asayaba ajanga nungtugo kümogo, yamaji nenok asoshia takok lenmangji sadema lapoka lir, ta tetushi tejaokerisa asayartem ajungmesoa shisem.

Longmisa Citizens Football Tournament ya tanga tournament ka ama masü saka iba tournament ya ajanga Longmisa nunger football asaya nung anitettsü nükjidong nung akar, küm anabuba tashi asayaa arudang Longmisa nunger anükapang kar dak alaka tangarbo metendaktsüi dang iba tournament ya asayadagi aser iba ya ajanga lanurtem football asaya nung ajungkettsü teimla tulu lir, ta Longmisa Village Council Chairman Wb. Merensosang ajanga lemsatep.

2 Buba Longmisa Citizens Football Tournament Final nung Zillion United FC aser Mejensanger FC tsüngda asaya aser iba asaya nung Zillion United FC-i goal 1-0 agi

Mejensanger FC kokteta takok marok benogo.

2 Buba Longmisa Citizens Football Tournament nung Champion-i sen Rs.20000/-, Runners Up-i Rs.15000/- aser iba den külemi jurila senpet Best Defender, Best Goalkeeper, Player of the Tournament, Most Young Promising Player aser Highest goal scorer parnokia sen meyirijang kaka agizüka liasü.

2 Buba Longmisa Citizens Football Tournament nung takok balala angur yamai alitsü.

Champion - Zillion United FC
Runners Up - Mejensanger FC
Best Defender - Mr. Tialong, Zillion United FC
Best Goalkeeper - Mr. Medemmar, Mejensanger FC
Player of the Tournament - Mr. Limatongzüük, Mejensanger FC

Most Young Promising Player - Mr. Temsupong, Arsenal FC
Highest goalscorer(6 goals) - Mr. Chubalemba, Zillion FC

Asian Olympic Qualifiers: Esha Singh-i gold medal angu

Aenjeti/January 8, 2024 (Agencies): Asian Qualifiers nung tetsür 10m Air Pistol event nung gold medal anguba sülen Esha Singh-i Hombarnü India atema Olympic quota ka ngutetogo. Varun Tomar-ia tebur 10m Air Pistol event nung gold medal ngua Olympic quota ngutetogo.

Asayar ana ya qualify asüba sülen Paris Olympics atema India nunger shooter temi quota 15 ngutetogo, koba Tokyo Games atema ngutetba quota den kasa lir.

Tanungba qualifier asayaba sülen India team-i ano quota timba angutsü timla lir.

India team-i Hombarnü Asian Qualifiers mezüngbuba anogo medal trok nguogo, kong gold ana densema lir.

Arishi küm 20 tain Tomar-i final nung point 239.6 ngua gold medal angu aser kasa mapang nung Arjun Cheema-i point 237.3 ngua silver angu. Kasa asaya nung Mongolia nunger asayar Davaakhuu Enkhtaiwan-i (217.2) bronze medal angu.

Maneni India nunger asayar Tomar (586), Cheema (579) aser Ujjawal Malik (575) nunger senteper point 1740 ngua 10m air pistol team asaya nung gold medal angu aser Iran o Korea nati silver aser bronze medal angu.

Arishi küm 18 tain Esha-i, tetsür 10m Air Pistol event nung point 243.1 ngua gold angu aser la sülen Pakistan tsür Kishmala Talat-i (236.3) silver aser India tsürsa Rhythm Sangwan-i (214.5) bronze medal angu.

Esha, Rhythm aser Surbhi Rao nungeria point 1736 ngua team asaya nung gold medal nguogo.

Iba asayamung nung Paris Olympics atema quota 16 angutsü maongka lir.

Tetsür aser tebur atema 10m air pistol asaya asoshi quota pezü lir aser India nunger asayartemi quota asembo agitettsü.

Iba asayamung nung linük 26 nungi asayar 385, Senayan Shooting Range, Jakarta nung Paris quota dak alia medal 256 (84 gold, 84 silver aser 88 bronze medals) atema toktepar

Iba asayamung Masaya tsüngda India team-i rifle, pistol aser shotgun discipline tem nung Olympics quota 13 ngur liasü.

Chennaiyin FC Mobashir Rahman Loan nung anirogo

Aenjeti/January 8, 2024 (Agencies): ISL club Chennaiyin FC-i ISL 2023-24 season tanungba asayatem atema East Bengal FC nungi loan nung Mobashir Rahman anirogo.

Iba jenjang agiba ajanga arishi küm 25 tain midfielder ya Chennaiyin coach Owen Coyle den tanaben longjemdaktüsügo. Tena ya Jamshedpur FC nunga külemi liasü.

Arishi küm 57 tain coach yagi Rahman kanga tuketja jembio, shibai ground teyongtsü nung team nem teyari tulu agütsütsü.

"Rahman ya sempet tajung aketba asayar ka lir aser aji pai Jamshedpur FC aser East Bengal FC nung asayaba mapang kuli agütsügo," ta Coyel-i ashi.

"Ni Jamshedpur nung inyakba mapang pa den inyakago aser pai koma asayaterer aji ni meteta lir," ta paisa shisem.

"Pa ya onok indang midfield

nung tongtibang asayar ka asütsü aser season nung tanungba asayatem nung pa den külemi inyaktsü yongya atar," ta Brit-i ashi.

Jamshedpur nung asoba midfielder yagia pa Chennaiyin FC nung adenba aser coach Coyel den tanaben longjemba atema kanga pelaba lemsatepogo.

Rahman tang tashi nung ISL nung asaya 83 nung asaya lir aser iba mapang goal ana idaktsüba den assist pezü süja lir.

"Ni team atema tajungtiba agütsütsü imla atar aser club nükjidong tongtettsü aser fan tem peladaktüsü atema anogoshia meranga inyaktsü," ta asayar yagi ashi.

CFC pur January 11 nü Kalings Super Cup nung Kalinga Stadium, Bhubneshwar nung Punjab FC den asayatsü lir. Iba sülen parnok Jan 16 nü Gokulam Kerala den asayatsü aser tatema Mumbai City FC den Jan 21 nü asayatsü.

DDBA-i Naga Olympic & Paralympic Games 2024 atema team sangdongogo



Dimapur, Aenjeti/January 8 (TYO): Ajaki kang dang yongya ata aliba Naga Olympic & Paralympic Games atema Dimapur District Basketball Association (DDBA)-i district tenü nungi asayatsü atema asayartem tenü sangdongogo.

Iba asayamung ya February 12 nungi 17 tashi asayatsü.

Asayartem ya Selection Committee tenü nung Convener Tiameren Amri-i sangdonga liasü. Taküm iba asayamung atema Dimapur district tenü nungi asayatsü atema tetsür aser tebur team nung asayar tajungtibatem shimogo.

Tetsür team:

1. Chumbenthung Humtsoe
2. Rilise Thonger (Captain)
3. Rajan Nayak
4. Rongsennungba Longkumer
5. Imsuren Longchar (Vice-

Captain)
6. Marshal Pashel
7. Bendang Jamir
8. Tovika Awomi
9. Tsentsuthung Lotha
10. Kamlenmang Andrew
11. Abhishek Singh
12. Rahul Leonard
Manager: Imchenchang Imchen
Coach: Moawabang

Tebur team:
1. Kenyuni Keppen (Captain)
2. Lituna Sukhai
3. Kevingunuo Terhuja
4. Sosentetla Aier
5. Kivitoli Ayemi (Vice-Captain)
6. Lunshila Quinker
7. T. Tongpangrepla Longchari
8. Achumbeni Ngullie
9. Maria Goretti Beck
10. Imchakumla Longkumer
11. Moidan K Phom
12. Pelekhonuo Kuotso
Manager: Hinoto Chophy
Coach: Alanthung Ngullie.

BILEMDANGANG

"Taküm, arishi, rongsen ajak asenok meyong masü."